

黃氏逸書考

懷荃室詩存卷三

繼揚王鑒翁廷初稟

孫承霖履青

恭校

坐月和張伯納農部

允言韻

新寒逼幽窗庭草綠已歇中宵起徘徊林際
露秋月微風漾清波吹散片雲黑橫空數南
鴈漸向遙天沒疏籬一叢鞠霜痕泣欲滴客
中歲易駛彈指幾盈缺廣寒不可梯豈第胡
與越

四禽言

不如歸去長安雖好春光暮世人底事輕別
離著鞭上馬不回顧不回顧青春誤不如歸
去

脫卻布袴年年織成幾匹布不能留取裁作
衣輸與縣官入府庫入府庫化爲蠹脫卻布
袴

提葫蘆醉時天地醒時無莫將醒眼看人世
鋪糟啜醢歌嗚嗚歌嗚嗚樂何如提葫蘆
行不得也哥哥哥哥江湖滿地多風波路上風波

猶自可世上風波可奈何可奈何休也囉行
不得也哥哥

無題

一樹芳菲傍水潯惜春怕見葉成陰扇藏舊
篋羞明月盒貯瓊膏贈暖金連臂踏歌迎赤
鳳背燈孤坐盼青禽愁中贏得精神王夜夜
無眠到漏沈

未礙蓬山隔萬重此情須共漆膠濃音書人
滯憎魚鴈形影相依妒駟留留枕爲誰經洛

浦抱琴莫再適臨邛倡條冶葉知多少每到
芳時意轉慵

畫圖爭得下真真拚覓仙源一問津不信參
辰乖會面豈真牛女是前身葳蕤閉戶惟通
月栲栳量金浪買春多恐相逢已遲暮韶華
如許付輕塵

風蹙萍花漲碧池閒庭簾捲日遲遲但憑蜀
錦聯鴛翼漫把并刀斷瀉絲刻意傷春憐蝶
瘦乞心療疾笑虬癡永豐坊裏青青柳攀折

應過幾萬枝

遊春一夢渺難尋
斗轉參橫月墮林
白玉雙環龍女佩
明珠一顆烏王心
繡囊寶鏡留雲影
小閣熏爐燼水沉
今日蕭郎帶圍減
侯家簾幕自深深

張紹讀將赴保定以生日會照相圖屬
題作此贈行

良會非偶然
當境詎珍惜
一聞驪駒聲
倏爾感今昔
圖中數君子
半爲遠行客
胡君尤可

哀茫茫生死隔

謂信芳

賴此尺幅中依然共晨

夕我非圖中人一一識標格吾子重交游與
我久莫逆都中二載餘脫畧忘形跡今茲忽
言別使我摧肝膈君行豈得已將有斯民責
山川多險阻插足慎所適毋爲短孤伺毋爲
腐鼠嚇肝膽毋輕吐論議毋急迫和光同其
塵守黑知其白待騁騏驥步善養鸞鳳翮我
於塵濁中浮沈得安宅持此以贈君慎毋一
笑擲明日征車動迢遞便數驛離愁不可量

但覺天地窄願君宦成後相期在泉石過從
畢此生無事按圖索

讀桃谿雪傳奇弔吳絳雪

絳雪名宗愛浙之永康人善書畫琴
棋音律尤工詩著有六宜樓橐及綠
華草時人稱爲桃谿女史適邑諸生
徐明英生游幕於外聞耿逆叛陷鄰
郡趣歸中途病卒柩未返而耿之別
將徐尙朝薄永康縣令與都人士謀

逼絳雪出以款賊絳雪毅然往給賊
退兵然後投崖死黃韻珊爲譜桃谿
雪紀其事按黃安濤絳雪傳謂其未
幾而寡不言徐生卒於途又言賊豔
絳雪名與傳奇小異韻珊自敘言得
之吳康甫安濤亦得之康甫不應有
異辭安濤之傳殆爲永康諸大夫諱
耳

銀潢案戶簾影低驚鴉繞樹蛩吟悽秋窗一

燈照青簡凜凜生氣存紅闈紅闈少婦顏如
玉郎君文采驚流俗伉儷爭誇竝蒂花唱酬
巧製迴文幅漫道明誠勝易安畢竟秦嘉讓
徐淑豔福由來遭鬼妒人生那得長相聚匆
匆僕馬事遄征元瑜書記爭延譽機杼空聞
烏夜啼笙篴伯奏公無渡揭天鼙鼓動如雷
一角東南化劫灰急辦歸裝從間道僕夫況
瘁馬虺隤當時繫馬憐芳草今日歸心逐征
鳥吳質工愁體素羸那堪風露侵昏曉逆旅

哀吟賦鵬篇玉樓文字需長爪思婦樓頭柳
色新眼穿腸斷盼歸人可憐一別長亭路從
此人天隔兩塵血淚斑斑染素衣遲遲旅櫬
幾時歸妾心已作古井水不分風波平地起
赤眉萬騎逼郊垆舉鋒鳴鏑斜陽紫鞵尖欲
踢州如斗長官不敢嬰城守誤將狂寇當夫
差款敵惟憑好姿首新寡何曾解聽琴此行
爭忍負初心入關趙壁拚教碎照乘隋珠一
旦沈璧碎珠沈事可悲此邦愧煞眾男兒懸

崖一躍翩然墮不羨文姬返漢時譜入宮商
聲激烈高歌不覺壺敲缺萬古香銷恨不銷
請君試聽桃谿雪

方澤山示余近作率成三絕句贈之時

四月十二日余與澤山同下第

綺歲登壇冠一軍

君巳丑馬舉
首時方丁年

翩然六翮欲

凌雲詩篇字字皆珠玉笑煞南豐只綴文

猶記肩隨識畏之

尊市以霖先生長
余十年余兄事之

丹山快

觀鳳鳴時指眸展卷吟千遍何用班書佐酒

危

故人幾輩到蓬萊莫使雄心一旦灰
遇合不須爭早晚願君捲上好重來

送傅臣南歸

都門同眊睨執手臨路歧通塞何足論
黯然又別離暮春君南來聚首幾何時
浮雲游太空倏忽東西馳聚散何有常
明日各天涯問我何時歸歸期未有期
君歸奉慈親所以展孝思我有妻與女
做屣棄如遺豈能置度外

三年迄於茲苟非飢所驅胡戀長安爲有情
生芳草無情生柳絲芳草礙行路柳絲難繫
維君歸我不歸氣結無一辭

東風

東風一夜謝羣芳燕語鶯啼又夕陽銀浦幾
曾渡河鼓藍橋只是誤裴航香留鳳牕添惆
悵心透犀殊竟渺茫見說參軍新覓得可憐
依舊屬王昌

春物揭曉主文者意有所屬得
一卷首置之以爲必其人也乃

戲及之

誤故

寂寞

寂寞蓬門意早安
鴿媒何用苦欺謾
不逢蕭史原關數
得嫁王昌也覺難
緘札望穿天外
鶴黛痕愁對鏡中
鸞浣紗舊侶吳官去
只恐尋常一例看

江鄭堂募梓圖爲江建赧作

削刷紛紛作者多
也同沙數滿恆河
可憐頭白江南客
獨抱羣編喚奈何

六經猶出秦灰呵
護應知造物心
後但使立

言真不朽斷章軼句抵兼金

恨我遲生數十霜未能問字到鱣堂披圖得
識先生面羨煞奚童許負囊

壬辰九月十六夜月食既

太陰藉日得光耀距日漸遠明漸加朔望弦
晦有恆軌互古不以累黍差有時或與闇虛
值遂令玉鏡韜光華闇虛者何大塊影月當
衝日爲所遮此是二曜眞望候非關災異休
歎嗟食深食淺可預測古今推步多專家昌

黎玉川號博物誤信謬說罪蝦蟇聖人立法
示後世每因天變警淫奢愚民惡能識天道
紛紛救護亂如麻叩槃擊缶達四境繁聲促
節驚棲鴉旅人對此不能寐坐看東方升朝
霞

將發永嘉聞卞頌臣制府歸道山

雲邊昨夜大星沈蹀躞江臯感不禁抱疾祗
愁誤家國乞休豈爲戀山林琴尊過從空際
跡風雨淒涼助苦吟記取城西高會處他時

歸去怕登臨

節麾前此過邗溝祖帳東門送入驛四載匆
忙驚歲序一朝零落慟山邱諫章賸有焚餘
草規畫常深事後憂料得九泉定回首漫漫
蜃氣接天浮

廿年前與世相違苦憶龍門長價時縱酒放
歌容我傲搏風失路負公知平泉芳樹鬪人
夢澤國江離楚客思西向一尊遙致奠後生
今日鬢成絲

登謝嶼

孤嶼中流峙維舟待午潮登臨尋勝境興廢

問前朝古廟忠魂託文文山北歸信宿於此今有祠危樓鬼

趣饒多情有泉水後約苦相要嶼有泉俗謂回環水飲之

者當重來

謁文文山祠

雙塔撐空迓客舟傳聞信國此稽留間行不

道身能返復振無如局已收靜院寂寥啼杜

祝丹楹剝蝕走蝸牛當年一把孤臣淚染上

江楓萬古愁

甌江舟中憶張伯納卽寄之

輕舟夜行不能寐推窗忽見北斗斜京華迢
迢四千里雲山萬疊望眼遮憶君送我作長
句敏捷不讓溫八叉挑燈背誦三兩過清芬
猶覺在齒牙別來幾度月盈闕離愁棖觸紛
如麻笑我南歸何所爲僅能十日留吾家風
濤泔險幸已慣天吳海若休矜夸永嘉山水
擅奇麗濃青淺黛難疵瑕陰晴朝暮各有態

參差歷落含清華涼秋九月霜氣薄丹楓夾
岸如月霞山腰時時見飛瀑安能浥取煎茗
芽可惜舟行太匆遽未容登眺殊咨嗟知君
素性好游覽一官束縛勞趨衙願君他日一
麾出蘭橈桂楫泛若耶詩才更得山水助留
茫處處籠碧紗我因看山不暇接欲覓詩思
茫無涯對此好景道不得山靈不免誚訕加
新詩遺我久不答且將風景從君誇抽毫濡
墨書未竟不覺月沒啼朝鴉

黃尉亭文以耄年自述百韻寄示兼索

題詞作此報之

憶昨經姚江伊人歌宛在頗思親杖履舟子
不能待新詩遠寄來粲然珠百琲生平所歷

境一一訴真宰先生碩儒後

文爲梨洲先生裔

探討

棄凡猥寫天通渾蓋測地追章文捷徑肯示

人文著有交食捷算五緯捷算等書

功力省百倍卓哉梅宣

城相望二百載我亦志斯學力弱屢疲殆譬
如一芥舟將以泛溟海又如饕餮客異味不

療餒中更人事擾蹉跎鬢爲改他時祝期頤
躋堂瞻丰采分我甘谷液爲我澆磊瑰

答味如寄懷三律

清談煮茗記春初電掣風馳逼歲除道遠易
回羈客夢悶來重檢故人書奇才卓犖無餘
子苦調淒涼怨索居展轉燈前不能釋一庭
涼月渺愁予

何曾容我看江山付與匆匆一瞬間日暮遙
知飛鳥倦塵勞始信海鷗閒未除豪氣難詭

俗願覓神方好駐顏書劍漂齋呼負負碧天
盡處認鄉關

成佛生天誰管得紛紛物論本難齊閒情苦
詆陶彭澤綺語何傷李玉谿桑下經過緣自
淺蓬山縹緲望都迷明年寄語長安道芳草
休教礙馬蹄

感賦

盛世懷柔覆載寬萬方玉帛集長安貌貅久
罷雲中戍蛟鱷猶掀海上瀾莫漫優游賭棋

局更誰矍鑠據雕鞍九重特下東征詔廟算
何曾獨斷難

當年失策罷珠厓醜虜貪天未有涯但道鞭
長難及服豈真甌脫可忘懷亡羊未礙牢遲
補爲虺須防厲已階此是龍興臣服地諸公
努力掃煙霾

渡海旌旗映九霄雄師十萬湧如潮飛輪破
浪追奔馬勁箭當風看射鵬毋使遐荒輕上
國須令侵地返中朝至尊佇望軍書捷銅柱

於今著意標

補琴退山招飲城南王氏水榭因泛舟
寶泉河復至天寧寺小憩

長安車騎紛如織，熱惱填胸澆不得。尋幽忽
爾得異境，開眸便覺塵慮息。綠陰壓檐不知
暑，苔痕猶帶前宵雨。葉底鳴蟬訴清潔，野花
獻笑如解語。豪情勝概惟吾儕，科頭箕踞忘
形骸。酒兵勝負何得喪，狂呼爾汝無忤乖。西
山侑觴當戶牖，無邊蒼翠開愁懷。殺核未盡

復聖堂詩存卷三
三
客醉飽小舟如葉循芳沼零落紅蓮賸幾枝
玉容似怨西風早菱葉浮波翠可憐芡盤貼
水藏晚煙扣舷莫唱江南好此間風景堪流
連流連未厭游人意驅車更訪城西寺

讀史

洞簫賦就宮人誦狗監遭逢薦士時莫道名
山多捷徑不然爭得九重知

陰謀秘計妙如神鍾繇當年邁等倫可笑計
然籌十策沼吳勳業屬他人

射雕射虎總休休結髮從戎到白頭自是將
軍無福分下中李蔡早封侯

公孫牧豕幾經年再赴徵車意索然昔日罷
歸今拔擢君上造命並無權

正平麗製傳鸚鵡字字淒涼似乞憐當日才
人真氣盡抵令不忍讀終篇

文季琵琶羞作伎參軍巒語笑投閒可人算
有謝康樂苦憶長瑜索見還

偶成

懷聖堂詩存卷三
鑿空頻經萬里沙奇珍入貢自流遐天心自
欲通中外莫以開邊罪漢家

遙祝吳閭山丈七十壽

南極星躔麗鱣堂歲月新縣弧溯初度介祉
紀嘉辰岸柳剛迎臘江梅欲放春定知高會
處鄉味有鱸膾

梁孟當年案同臻黃髮期况當豹隱日喜見
鳳飛時文舉盈尊酒淵明數卷詩如游懷葛
世甲子不須知

門巷成鄒魯人爭御李君深慚困塵鞅未許
挹清芬幸接諸郎席遙瞻故國雲他時甘谷
液願乞一杯分

重有感

無邊烽燧起搏桑敢效當車奮臂螳參伐偶
然匿光采欃槍竟爾耀遐荒頻看溟海腥濤
湧共恃堯天化日長死後祖龍餘毒烈求仙
苗裔作封狼

昆明習戰閱年華兒戲言兵尙示夸橫海戈

船盡芻狗出關壯士化蟲沙金留懷袖微如
菜山入臙脂豔似花蘇武節應不如是但將
忍辱報大家

帷幄全資輔弼臣諸公疇昔負經綸失機但
欲寬楊僕命將何曾遣祭遵忍以殷憂屬君
父不嫌藹睡有他人昨宵覓得蒲桃釀且自
開筵醉好春

豈無魏尚在雲中爭奈諸君志不同轉戰獨
能分敵勢赴援誰肯共奇功天山夜月笳吹

黑瀚海層冰血染紅今日底須用頗牧中朝
上策是和戎

桓桓相國髮皤然風雨催歸奉使船始信陸
生功不世祇應衛律罪通天墨朱畫界圖甘
獻栲栳量金壑漫填憶否開疆諸將校枕戈
終歲臥蠻煙

己亥六月三日爲陳六月丈七十壽辰
觴故舊於都門郡館之盍簪小築時
先生遂初旣賦治裘將歸余於筵次

得七言四律

擊揆嘉辰解組初歸衰儘有鄰侯書壽民丹
已留三輔具酒金還讓二疏世事憑人笑鸞
鳳鄉心底爲憶鱸魚門前卻喜無車騎樂聖
銜杯歲月舒

福分多應造物偏一門眷屬盡神仙芝蘭茁
秀生瑤砌杭秫逢年到葛天羹薦行廚丹棗
麗酒斟甘谷碧筒鮮清寒便是長生法試誦
先生歸興篇

使星出入幾迴翔，卻曲歌來足未傷。誰爲閭
閻除疾疾，且將泉石作膏肓。觚觫夢影緣忠
愛，棋局爭機付澹忘。何用更尋伯山甫，此心
安隱卽神方。

乘傳追陪兩浙游，光陰屈指幾春秋。長安今
日逢高會，甲子他年祝再周。致政羨公能勇
決，求官笑我尙淹留。學僊未免周何累，聊借
金尊一破愁。

劉謙甫五十初度寄詩壽之

與君生同歲長我迺一月屈指屆知非流光
何儻忽論交既數世里閨况相接乃爲飢所
驅往往限胡越解經推君家一一得癥結稽
古達天聽三世儒林列難兄及難弟聲譽皆
殊絕君尤嗜九數探竒到月窟我亦有同癖
秘密互相洩浮名任時數卽此足怡悅都門
值深秋叢鞠凌霜發聞君返邗上高會慶嘉
節笑我歸未能何以慰飢渴祝君詩一篇且
因郵筒達願君心安隱研究長生訣日飲什

谷泉毋使生華髮

馮烈婦詩

靈丹何處尋瓊島無情畢竟天難老急雨摧
殘並蒂花西風零落紅心草人間緣分何匆
忙綵鳳初歸遇角張賦鵬賈生悲楚些嘔心
長吉慟笑囊焚香夜夜誦金輪梵呪無靈誓
殉身但願死爲北山石不甘生作未亡人女
媧石碎天難補魂歸應共兔禽語滄海成塵
恨不銷君不見青陵臺畔風吹雨

王萼樓宦游粵東作此贈行

聚散渾間事留君進一觴
著鞭輸祖逖索米笑東方
跡共征蓬轉春隨驛路長
莫因三尺法孤負小奚囊

嶺南荒服地近代啟文明
海闊濤難靖山溫瘴易生
外交持國體互市達輿情
他日專城寄毋忘夙昔盟

此別天南北郵筒意可通
河邊饒錦鯉雲外有征鴻
新柳依然碧朝曦無限紅
殷勤且閒

話車騎漫匆匆

劉健之比部暫返臨湖索詩贈行作此

報之

燕市塵飛衣化緇鏡中鬢影已成絲
違時敢道知音少結契同嗟識面遲
落落酒兵慣投轄匆匆車騎又臨歧
年來嬾索長安米莫誤西窗翦燭期

聞七月二十日北信感賦

腥濤無際鯨帆縣上國爭盟歷歲年
灞上旌

旗看似戲修羅兵仗雨從天乘輿不分成孤
注帷幄還應策萬全今日賈生更何說側身
北望一潸然

建牙開府主恩隆帳下材官氣似虹已報會
師齊北犯未妨互市在南中發端誰肯寬鼉
錯兩利幾疑聽蒯通滬上私盟防餌我莫將
長策恃和戎

海禁開時患已萌言強言富總無成榻前底
事容酌睡輦轂何堪更弄兵銅雀無靈隨月

墮金人有淚向天傾
中原將帥休安坐
試看機槍徹夜明

援絕城摧勢不支
深宮聞警抑何遲
遙知魚服微行日
共慶鸞旗出險時
道士一甌甘麥飯
亭邊七寶認鞭絲
傳烽已遍諸行省
更有何人起誓師

游仙

和王子裳太守疊韻

跨鳳驂鸞有從官
滄溟無復昔時寬
行廚塵污青精飯
月夜風吹碧玉冠
徼外沙蟲問姬

滿雲中鷄犬說劉安回頭遙指最高處貝闕
珠宮鎮日寒

求得玄珠象罔功勝他七聖到空同好從闔
苑徵雲母不向涇陽課雨工山甫神方隨意
檢密香書札幾番通文成五利休饒舌爭似
靈飛篇目中

徐福空聞海上過秦皇應已悔蹉跎昆侖東
去連三島銀漢西流注九河乘鯉琴高情自
適釣鼈龍伯志難磨試看玉女投驍處只是

當時脫誤多

支機片石爲誰留到此應迷漢使舟方朔許
窺西母宴盧敖憤結太清游曲終江上峯仍
碧柯爛山中局未收且把踈烏向東轉人間
宋玉莫悲秋

懷荃室詩存卷四

維揚王鑒翁廷初稟

孫

承霖

履青

恭校

丁松生以六十自壽四律見寄竝屬和
數月以來人事紛擾未克握管昨歸
棠湖匆匆把晤追憶三十年舊事猶
如昨日松生豪氣不減且以嗜痂之
癖責僨詩逋爰成四截句以報

屈指朱櫻正熟時棠湖風景最相宜遙知高
會羣仙處應憶天涯杜牧之

翹首江雲感索居故人迢遞致雙魚閒緘細
讀清新句一字還應抵一珠

白日堂堂感逝波元龍豪氣未消磨休論三
十年前事執手相看鬢已皤

羸得尊前見在身只愁滄海又成塵桃源覓
得君須記莫便尋常說與人

蔚丞寄賦見懷二律卽和原韻答之

索米長安歲月多祇今猶夢渡滹沱春從直
北關前轉鬢向天南鏡裏皤珠海有波藏蜃

鰭炎荒無地植杪樵故人遺我新詩句展讀
渾忘夜漏過

宦南判襪又經年迢遞燕雲隔暮煙萬里心
隨飛鳥倦一緘書倩錦鱗傳期君共作名山
計笑我思尋負郭田犵鳥蠻花無賴甚海邊
時數北歸船

味如四十初度率吟三律以代祝辭憶
十年前同客京華適逢此日同人聚
飲於廣和居極觴詠之樂曾幾何時

轍跡東西關河間阻戊申歲余來羊
城值君箱符長樂昨以量移新會晉
謁大府因來省門獲傾積愫旋又履
新匆匆判襪余日與市僧爭一日之
短長不克拏舟訪戴一與高會翹首
匡門山色神爲之往矣

旅館鷄聲憶昔年壯懷欲著祖生鞭青春只
合教長駐赤緊何妨當小鮮世事轉移看北
斗浮蹤漂泊聚南天江干官舫匆匆發屈指

銀蟾幾度圓

燕市祝君初度日十年前事記偏真當筵舞
蔗風雲變對月傳花壁壘新此境分明留夢
寐幾人離索限參辰遙知東閣尊開處舉酒
還應見憶頻

都人恨得使君遲仁壽同躋政簡時堂上報
書傳吉語閨中勸酒賦新詩秫秔計畝煩商
畧蘭蕙生階好樹滋我効長公誓江水買鄰
他日與君期

曼青寄示二律竝以素紙索書因私原
韻書以報之

百日光陰一彈指
漆園夢覺尙遽然
須防植棘留今日
更莫栽桑似昔年
人世易迷三里霧
出懷喜見五銖錢
萬方翹足觀新政
想到循蜚疏乞前

大千原是乾淨土
翦盡萊蕪萬象春
馬上功名劉季事
殿前禮樂叔孫陳
畜人芻狗憑造物
戲水魚龍空劫塵
一室安居休擾擾
四鄰

穎同正頻頻

辨髮北漠之俗也去髮海外之俗也既
復中原應反初服

句吳斷髮長諸侯神禹曾爲裸國遊苦以兵
戎復炎漢祇應冠服效成周墊巾任我輕翹
鶻脫帽防人笑禿鶯但得威儀能再覩道有
父老復何求

分至啟閉太陽之躔次也朔望弦晦太
陰之流轉也氣則盈而朔則虛置閏

月以補苴之天差東而日差西置日
法以調劑之去演撰以歸實測破章
法以順天行愈推愈密日異月新中
曆之集大城西儒且與有力焉今因
交際而輒思遷就遂至舍月離而專
事日躔是何啻易雕宮於穴處反正
輅於椎輪乎具才識學迺可論事通
天地人斯謂之儒與其偏而不舉不
惜強我就人何如參以相觀庶免顧

彼失此博雅之士當不河漢斯言

大撓甲子更無前調曆猶存舊簡編便俗宜
民推夏政授時置閏朔堯年盈虧往復憑占
候晦朔分明迺順天沈括曾經標異說莫言
法自秦西傳宋沈括曾建議以兩氣爲一月
不步太陰今之西曆正括之說
也

三字獄

莫須有必須有掩不盡天下目關不住天下
口人人集矢秦長腳東窗不貸長舌婦我謂

檜也何足誅此獄之成有戎首黃龍若使真
痛飲康邸藩封應退守二勝環置腦後三字
獄成檜手成檜手伊誰咎不然胡以自壞汝
長城甘心署臣構

挑燈杖

莫道微材未足奇室中明暗卻憑伊功分藜
照傳經日喜見花開卜吉時但得心長光易
續須防膏盡力難施清宵寂寞無聊賴伴我
消磨到漏遲

楊花

斷送韶華喚去休東風吹起滿天愁漫隨舞
蝶翩翩逝卻被游蜂款款留榮耀記曾移紫
禁漂蕩何幸入朱樓永豐坊裏蕭條甚護惜
無人任自由

歷徧山村復水村浮蹤去住總銷魂多情慣
趁離人騎有夢應過處士門纔逐啼鶯悲帝
子又依芳草憶王孫天涯迢遞歸何處撩我
風前盡一尊

羌笛哀吹倍愴神綿綿芳思付輕塵黏泥已
分醒前夢著水無端種後因寫怨有歌翻白
紵人魂無祝誦金輪長亭車騎朝朝過送盡
悠悠陌路人

畢竟非花還是花儘教拋擲路旁沙下山棄
婦空留恨出塞名姬苦憶家偶借燕泥棲殿
角底緣蛛網傍簷牙穠桃豔李皆塵土躑躅
隨堤日又斜

哭錦官

曾記當年受讀時，依依膝下父兼師。

余家居教授時

嫂氏命汝來學，即有後我之憶。都門留滯頻懷想，皖水相從

見慕思宗祀，繼承方屬望。山邱零落慟長離。

余年迫桑榆，方踐前諾。以汝兼挑，乃汝先我而逝，言之痛心。我書賴有孫

能讀，承霖詩古文辭及天算皆我親授，家學庶幾不墜。願汝重泉勿

大悲。

隆裕皇太后輓詩和蔚丞韻

地坼天傾海水枯，杜鵑啼後又啼烏。殯階寂寞千官位，苦次淒涼六尺孤。哀動神州蒼素

卷之四
祭數終賢劫證伊蒲銅駝無恙金人在贏得
鮫宮有淚珠

疊前

漢臘徒存淚已枯
延秋啼遍白頭烏
衡茅慟失君王后
衰絰悲同小國孤
雲黯沅湘迎羽葆
風淒御宿長新蒲
龍樓鳳闕皆泡影
爭及生天到藥珠

和秦曼青見懷原韻

韶景依然入眼新
遙天鴈影望頻頻
開緘薇

盥盤中露得句花生筆底春
笑我閒居忘魏晉
羨君高詠軼梁陳
年來贏得嵇生嬾
無復丹鉛識癸辛

閉門遣日誦南華
笑索簷梅已放花
廣武千秋誇逐鹿
慈明一棒說撈蝦
摩牋竟作前游識
覽勝何妨到處家
記取棠湖今夜月
清光分外照長沙

聞張理端逝世溘然賦此

燕市分襟又七年
忽傳噩耗到南天
底緣昌

懷李益詩有
谷乘虬客竟續長沙賦鵬篇回首昔遊如夢
裏傷心老淚落燈前竹西寓宅今無恙杖策
重過倍黯然

粉署爲郎歷幾春無端滄海又成塵未妨米
芾成書史莫道劉靈是酒人嗟我難勝哀樂
感憐君解脫去來身丹山鶴鳳清聲遠賴有
鴿原護視頻

和吳荇驥見寄二律原韻

天上雙魚落股勤問故人柴問方息影滄海

竟揚塵往事嗟成夢新詩妙入神應知漆園
吏結想到天均

浮蹤頻聚散離索況衰年束縛驚塵鞅荒蕪
笑硯田有書聊遣日無分望登僊湖上期他
日高歌共扣舷

輓劉許仲

京華一別十年餘春老江鄉歎索居棖觸離
懷數行鴈淒涼噩耗一緘書鋤蘭炎蕙天胡
醉破浪乘風願已虛最是庭闈遲暮日九原

回首慟何如

漱石以晚登吳山與功杜唱和之作見
示竝索和因步其韻

勝地一里游須痛飲卻緣病酒戒深杯岳湖波
靜沙鷗起葛嶺煙橫塞鴈來莫以投閒歌伏
櫪料應支厦正需材射潮人往空江晚怕聽
吹寒畫角哀

不須苦憶故侯瓜且共溫歧競入又高士空
亭誰放鶴美人荒塚漫停車邈移猶峙山幻

塔歸緩惟留劫後花千古興亡緣底事又看
天際散餘霞

凭闌極目感蒼茫宋代遺宮賸夕陽殘局圖
存留片土當年設誓返降王山舍宿雨雲垂
黑風過疎林葉隕黃如此湖山原不惡鄉心
猶自憶雷塘

功杜又疊前韻寄眎索和賦此報之

尋仙安得棗如瓜樂羨淵魚莫漫又酒肆甕
藏千日釀行宮路斷五雲車春遲岸柳仍含

凍雪霽林梅欲作花試向晚晴看落照彌空
幻作赤城霞

申江北望路迷茫又見鴻鈞轉一陽笑我耽
吟作馮婦久廢吟咏讀諸公唱和之作不覺技癢期君入室步

思王暮雲漸鎖千峯翠殘鞠猶留九日黃爲
語惠連詩與好介弟公達和章有清新俊逸之致助添佳句

詠池塘

功杜寄詩索和爰步其韻

心情曠逸柴桑酒筆陣森嚴細柳軍栽竹何

年借東海懷人竟日賦南雲葭吹六琯將更
歲樛折孤山欲寄君他日西窗重翦燭還應
敬禮定吾文

公達赴京應試賦詩留別作此奉答卽
以贈行

頻年轍跡悵分馳難得西窗翦燭時大好湖
山供勝賞無邊煙月助新詩搏風欲奮扶搖
力賦別留題絕妙辭此去宣南春色滿不須
揮手惜臨歧

偶成

入世誰參天地初塵囂擾攘竟何如忘懷不
借消愁酒習靜還宜引睡書幕府事閒春晝
永鄉關夢遠夜窗虛刹那駒影無人覺鏡裏
朝朝覓故吾

秦曼青以三十初度詩寄示屬和用原
韻報之

劫後繁華誰喚轉鬢邊霜雪苦相侵但憑錦
鯉傳佳句好共銀蟾證素心覓醉應儲千日

釀開緘不厭百回吟洞庭波與之江接比似
離愁幾許深

賢劫

賢劫推移數莫稽華胥夢覺惱晨鷄脩羅耀
甲諸天震象罔尋珠七聖迷碧落更無靈鵲
報錦江空有杜鵑啼忍教萬物爲芻狗衍罷
魚龍日已西

孔君小山以臧詒孫竹枝詞卷子索題
賦此以報

情之至言存
此老生平亦自奇，拚將泉石負清時。歸來無
復觚棱夢，不詠霓裳詠竹枝。

軼事依稀憶昔年，街談巷說信疑傳。燈前展
卷頻頻讀，想見揮毫信手編。

滿紙淋漓墨尚香，珍珠密字一行行。須知曼
倩俳諧意，莫道先生故態狂。

一斑窺豹見風流，雋語天成足破愁。宿草萋
迷餘韻在，羨君藏弄重圖球。

和丁鑑堂七十自述四律

原缺

哀雲邊鶴去人天，隔壁上龍飛。煙霧開

君工繪事

墨龍尤擅長海內爭相藏弄

留得錦囊遺棄在，鷄林應有

賈人來

汪幼儀明經

錫恩

近得兩孫寄示近體

如干首，迴朔生平俛仰，今昔情真語切，直抒懷抱，頗近白傅作此報之。

息影湖鄉，試索居故人珍重，寄雙魚、芝蘭、繞砌春常在，珠玉揮毫興有餘。靖節情懷付尊酒，雲卿事業記園蔬。年來我亦無聊賴，贏得

元龍豪氣除

和孔劔秋五千述懷

寄我新篇索我詩未分殘錦愧邱遲辭高幼
婦題黃緝巧奪天孫拂素絲澹泊情懷真似
水紛紜世事總如棊竹西佳處逢佳日想見
銜杯得句時

感時莫歎壯心違衝泌光陰好息機難得與
閒仍與健任他公是復公非眼前風月供幽
賞劫後湖山戀落暉千載興衰緣底事隋宮

何處認依稀

幾人快意著先鞭
迹跡詩願與酒顛
羈客浮蹤雲出岫
儒生長物硯爲田
羨君落筆追先輩
笑我無丹返少年
畢竟醉鄉堪遣日
焉知雲物有推遷

苦憶從軍賦小戎
唾壺擊缺醉顏紅
封侯不羨三千戶
涉世期逢十二蟲
高會料應無熱客
論文猶得到衰翁
祝君一語從君願
北海尊中酒不空

溫銘初以其室鄒夫人哀辭見眎并徵

輓作賦此以報

騎省哀章淚共零淒涼如訴不堪聽遺風自

是高鍾郝雅度何須避尹邢

君奉承繼慈命以兼祧應各娶

婦故復娶王氏而夫人聞之坦然也

翰墨餘芳原不朽金輪梵

呪竟無靈燈前舊恨頻根觸二十年前我亦

經

輓汪怡

怡孫汪君幼儀長子也於庚申七月

十三日病故年二十八時游楚初歸
一病不起初儀以哭子二聯寄示並
徵輓作爰賦七言絕句三章報之

鄂渚游蹤報作歸何期一病竟難支玉樓赴
召真匆遽正是秋林葉墜時

堂上椿蔭已暮年二齡弱息更堪憐九原長
抱無窮恨應向靈均一問天

顧況哀章動古今兩聯相較慟尤深雨窗燈
燼酸辛讀四壁蟲聲助苦吟

劉天石見眎都中詠梅舊作並奈君所
繪折枝徵題爰和原韻以報

長安風景應非昔難得相逢見在身近市僅
餘乾淨土連牆同作寂寥人靜觀朝槿敷穠
豔好倩寒梅掃俗塵無限情懷託高詠畫圖
留得一枝春

王安生自綏遠寄眎見懷五言四律作

此酬之

安生時之
東勝縣事

暑退湖濱葉隕初征鴻迢遞一緘書緬懷舊

雨勞存問爲賦停雲感索居邊塞地荒滯鸞
鳳江鄉天遠憶鱸魚殷勤追溯宣南事彈指
先陰廿載餘

故人寥落感離羣謝傳祠邊日又曛退守一
條應笑我壯遊萬里卻輸君尊前相共唯明
月天末翹瞻有暮雲何日西窗重翦燭痛斟
臨餘細論文

汪幼儀同年以其先王父芸生先生遺
墨卷子屬題賦此以報

永叔賦秋聲冷然清肺肝漆園狀天籟吹萬
妙無端原思歌商頌聲滿天地間門前車騎
客氣索廢然還讀書有真樂寧容志氣單聞
者足怡悅恍若游杏壇沉屬子弟行尤爲開

心顏

卷中畧言風聲雨聲琴棋聲鶴聲蟲聲皆聲之清者而讀書聲爲最聞他人讀

書聲固樂聞子弟讀書聲則尤樂也信筆偶書此詒謨見一班

家訓推黃門千載堪比觀鬼神爲呵護劫火
不能殘粵珠歸合浦和壁返邯鄲世人重簾
金徒令增愚頑燕山有義方龐公獨遺安尺

幅語無多至論永不刊願以書座右仰止詠
高山

題汪子儀年伯焚香補讀圖

袖中猶有御爐香自笑趨朝爲底忙
乞得閒身伴松菊山經流覽酒盈觴

文章聲譽馳畿輔猶自辛勤訂魯魚
淨几明窗無長物一爐沈水一編書

馬上漢書頻背誦室中藜照感神明
卿媛萬卷羅胸次得此何須擁百城

懷聖堂詩存
杖履追儻昔年後生今日鬢皤然披圖儼侍
春風坐勝讀顏家勸學篇

幼儀寄示展覽會竹枝詞

新詩一卷遠相投展誦真堪作臥遊孤負良
辰緣習嬾評論佳句足忘憂諸般色相空中
過十日韶華筆底收卅首竹枝工紀麗吾鄉
合號錦揚州

幼儀以楹聯一卷見示賦此報之

彩筆花生絕點塵天然僂語忒翻新竹西佳

處都題徧應爲湖山作主人

祝蒿庵中丞八十壽

橫塑詞場邁等倫殿前臚唱第三人文章曾
貫都門紙膏澤長留皖水春世變幸無天下
責身清不染劫餘塵欣逢高會稱觥日願逐
羣仙到大椿

劉稚樵六十五生長同人爲之徵詩賦
此以應

同舟皖水悵分馳

余與君同官皖省君蒞皖時余適調粵

治劇

頗留去後日

君宰和縣及天長頗著政聲

彭澤折腰原不

慣荆州識面已嫌遲遂初好著歸田錄攬揆

欣斟獻歲卮心裏桃源隨處是

君自壽詩有桃源自在吾

心裏

此中消息幾人知

乙丑九月八日秦曼青母諸葛太夫人

八秩生辰賦此爲壽

記詠城南舊草堂又逢高會進霞裳瑤池春
滿桃剛熟邗水秋高菊正芳壽母徽音榮里
黨郎君詞賦動江鄉再周甲子渾閒事不藉

仙人駐景方

汪幼儀寄示七十述懷七律六章屬和
賦此以代賀柬

寂寂湖濱感索居雲天超遞落雙魚新詩脫
手推敲後舊事關心襁褓初劉向傳經家學
闡陶朱握算宦情疏突黔車耳徒勞瘁爭及
優遊守故廬

雌伏雄飛各有因最饒福分是閒人不行世
上崎嶇路贏得尊前現在身稂莠逢年天與

健芝蘭繞砌室生春
但將積善留餘慶
肯爲浮名染俗塵

結社論交五十年
相逢共笑鬢皤然
眼前景物分新舊
劫後風雲幾變還
玉甕醲春時一醉
錦囊麗句富千篇
而今叔夜疏慵甚
不克拏舟赴猗筵

劉謙甫八十生日賦此寄賀

六十年來接後塵
皤然白首尙如新
故鄉歸隱借難弟
中壘傳經有替人

君家世傳經學
歷聘公

卿忘勢兮論交金石見天真
泮宮芹藻曾同擷
爭及尊前矍鑠身
君耳聰目明步履如平時全耳既重聾目愈短
視足力亦弱
迴不如矣

懷荃室詩存卷五

維揚王鑒翁廷初稟

孫

承霖

履青

恭校

效曹堯賓小游仙

六萬年中轉巨鼇
五山縹緲峙波濤
偶然折得珠玕樹
易取瑤池怎熟桃

集真大會不輕逢
東望滄溟起燭龍
小別還須留後約
一千年是去來蹤

徒向空同幾度游
不勞塵外覓丹邱
玄珠得失分明示
象罔無心爲爾求

一幅崑崙好畫圖容成醉裏費工夫待逢鑿
空西行日試問張騫識得無

丹房扃鍵不堅牢費盡精神罔自勞應是姮
娥無賴甚廣寒宮裏任逋逃

分形化氣結胚胎不見恆星照夜來未涉世
緣先白首個中消息費人猜

一軍猿鶴與沙蟲馬足車塵絕域通八駿東
歸人寂寂峯頭惟見白雲封

昨夜玉簫相對吹一雙彩鳳趁雲歸天荒地

老長廝守不信人間有別離

玉宇瓊樓別有天洞中晷刻永如年閒來攜
得縷雲枕好向崑崙頂上眠

函谷西游路幾千囊生無那負備錢靈符不
及泉刀貴徐甲當時亦罔然

邂逅關門便有緣東來紫氣望如煙五千道
德親相授羊肆相逢再拍肩

青雀傳來密密期行蹤生怕外人知誰知朱
鳥窗前客立到更闌燭跋時

玉手親題字數行一函臨發更端詳斜封紫
印從頭看付與如心郭密香

早已丹成證九還還從天上羨人間武皇內
殿停鸞馭簫鼓聲中拜阿環

傳女傳男畛域分靈飛篇目說紛紛可憐萬
乘居人極長跼深宵不許聞

無端三次作偷兒記得西山果熟時洗髓代
毛太容易今番說與世人知

太隱金門十八年殿前執戟亦欣然君王畢

竟仙才減方士空教到海邊

近日遨游到上清卻從太帝問丹成天風一
路吹襟袖雲裏先聞環珮聲

若問蓬萊便是家飢來同煮赤城霞臨風偶
抱雲和瑟彈落前溪一樹花

絳都太史詔初頒鸞鶴紛紛立兩班今日巡
行東海去前旌已過萬重山

挂實松脂久厭嘗更將白石作餽糧袖中一
卷參同契月下同尋魏伯陽

飈車迅疾羽輪輕，相約來朝赴碧城。
好覓餘杭新釀酒，天廚開處醉千觥。

繡衣戔髻影迷離，侍從相扶下馬遲。
貪看瓊林好煙景，險教負卻玉峯期。

欲渡無舟奈若何，祇應天上淚痕多。
金錢二萬尋常甚，贏得年年限絳河。

桃開桃實幾千年，阿母園中列綺筵。
齊捧瑤觥爲君壽，兩行紅燭待傳宣。

九垓足迹幾週遭，水盡沈沈未易消。
偶載棋

枰尋玉女峯頭戲賭碧蛟綃

仙鄉逐日酒爲鄰醉臥崑崙多少春覺後不
知人事換怪他滄海又成塵

安得飛魚徧大千輒紅塵裏盡神仙河須更
羨中山酒似醉還醒二百年

五色珊瑚百尺柯爲勞鬼物共撝呵笑他世
網終無極偷得殘枝出素波

銀潢一帶水盈盈漢使無端到此行贈與支
機莫回顧成都市上覓君平

玉井紅蓮昨夜開紛紛太華看花來何時再
觀雲華唱扶上青鸞首更回

移家卜宅到衡陽只爲情牽兒女腸嫁服無
人能代作自拈金線繡鴛鴦

學得超昇住翠微春來不唱雉朝飛笙簫對
對分班過親拍紅鸞迓婦歸

繫足紅繩屬女媧生來緣分總無差靈根仙
種非凡品到處開成並蒂花

飛泉作枕石爲牀數百年來在睡鄉清夢被

人驚喚轉且留抵足話滄桑

幔亭山色接青雲風送歌聲笑語聞檻外有人窺伺久祇今艷說武夷君

臨去曾留駐景方音塵一別事茫茫中原銅狄荒榛臥猶自含情說武皇

盡日投驍興未闌元霜絳雪當傳餐箇中得失渾閒事已被天公笑眼看

媽紅姹紫一叢叢滿苑花開頃刻中五萬春華都放轉卻將狡獪奪天工

三千弱水倩犀分海上逍遙日又曛一舸凌
風自來去玉簫吹破碧天雲

莫因瓠落歎難容百代光陰過客蹤橘裏生
涯天地闊一枰劫急尙爭鋒

織錦機邊梁玉清不因多露怯宵行溫柔鄉
裏謀終老私抱衾裯到衛城

笑他歧路逐亡羊原在山中臥夕陽俗眼那
能虧破得一鞭揮起下平岡

三年跌坐透元關得食餘丹豈等閒浮石洞

中風丹夜笛聲猶自滿溪山

受詔蓬萊使按行先將數語報方平今肖海上匆匆過特遣龍君免送迎

綺席初開酒乍停如雲騶從降中庭盤中麟脯輕輕擘不把餘羹賜蔡經

珠盤玉醴佐春蔬良夜迢迢角酒初奇癢心頭搔未得纖纖手爪渺愁予

苦憶親栽玉李甘恨無青鳥爲相探風光彈指三千歲遙見華陽接蔚藍

畫圖授受費丁甯筆底煙雲入杳冥笑煞匡廬能識面可知五嶽有真形

不用勞勞問米薪廚中自有作羹人謀君中饋難君伴恐被情絲縛了身

塵心未盡念家山草草情緣亦太慳路轉峯迴須記取白雲深處待君還

幾日山邊射玉芝偶然一矢暗相遺扁舟來往需風力莫誤樵薪朝暮期

雲房間坐太無聊忽報方回折柬招新合

甌雲母粉與君排間度深宵

報道王喬躡履歸當時蹤跡笑鳧飛遙看吉
月趨朝處一點微塵認紫微

舊時儔侶笑相呼緱嶺風光自不殊手把玉
笙吹一曲一齊同坐錦攏瑜

記否先人訪赤松功成不願就侯封家風今
日真能繼天自山頭萬法宗

懸厓直上矗天垠石洞雙扉指願成但使五
丁親見得鑿山應悔太勞人

懷聖堂詩存卷之二
親從太上受真符簇簇雲旛照八區十萬天
魔齊褻膽一時帖耳效馳驅

漫把機心到處爭乾坤祇是一楸枰若教悟
徹玄虛理須問當年負局生

出世何曾解斷腸相思滋味笑初嘗劉郎去
後東風嬾開到桃花怕曉妝

十二巫峯面面開行人何處認荒臺朝雲暮
雨休輕視除卻襄王不肯來

玉爐金鼎守層巒九九良時火候難聊向溪

邊洗餘瀝一溪洗水染成丹

度朔山桃又結成飛觴角酒令分明芳筵聚
散須臾事已報黃河幾次清

姑射迷離隔世塵冰爲肌理雪爲神漆園小
吏殊多事蹤跡無端說與人

偶泡幻影涉塵寰一幅縹緗寫玉顏何用藏
嬌費金屋眞眞呼出畫圖間

法華七卷繡來工只在鵝綾尺幅中妙手靈
心誰得似何須鉞絕豔吳宮

五雲閣史好頭銜翰墨淋漓氣不凡昨夜通
明親被召芙蓉冠子芰荷衫

池中光氣燭宵明龍子居然盡長成從此昇
天能代步好從閶苑問長生

欲償逋負苦相淹三日能成六百縑試捲素
羅衫袖看爲郎顛頰指纖纖

自署中山衛叔卿青芝相贈見深情連朝共
定天元數漢帝宮中不再行

一雙條脫玉無瑕珍重宵來萼綠華傳與神

方莫輕洩人間只解飯胡麻

莫因惜別暗魂銷拔宅何妨到紫霄依舊一
門長聚首勝他世上可憐宵

先機欲救漢家亡慷慨憂時上諫章他日羊
裘終不出祇緣作媢到南昌

通詞不必託微波羅襪生塵喚奈何枕上相
思會相見陳王從此慰情多

兩顆明珠不染塵此中色相幻還真鍾情笑
煞癡兒女交甫何曾是解人

風拂雲鬢顧翠翹忽逢西使戚逍遙停驂細
問須彌景不覺銀蟾出海潮

從軍萬里事長征未得功成證道成每遇下
方爭戰日洞中怕聽鼓鼙聲

溷跡風塵閱歷多眼前爭奈眾盲何苦心度
世無人識拍板高吟踏踏歌

共挽雲車願不乖排空馭氣總相偕低鬟下
望來時路留得芳洲號墜釵

園中逐日飼蠶忙安得羅敷爲采桑賴有春

蠶作媒灼侵晨攜手詠承筐

新得通靈輓玉鞭驅波逐浪妙無前何富贈
與牛郎處不藉飛鳥五夜填

太陰鍊質妙通神苦把真詮細細陳小有天
中薰沐後共迎南嶽衛夫人

年年兀坐有龜牀萬載光陰去太忙難得世
人蹤跡到細詢時代憶軒皇

白雲飛去鶴飛來五月江城聽落梅酒債須
尋桓子野橫吹玉笛暫徘徊

萬仞峯堯紫閣峯洞天雲氣暗重重
攜尊共醉新醅醪爲問何來俗客蹤

旁觀袖手興猶饒已見斜陽桂樹梢
爛盡斧柯渾未覺百年駒影忍輕拋

初授華陽女侍郎尙衣特賜紫霞裳
舊時侶伴齊相賀水陸分陳壽一觴

鸚鵡能歌漢禁詞阿春低喚谷來時
留連靈境迷歸路知否舟人挂席遲

種菜荒園亦自嘲何來金帛苦相驕
囊中辛

有餘貲在五百緡錢聘阿嬌

不道壺中餘地多何容更覓好行窠可憐傳
舍空留戀宇宙茫茫一瞬過

七日神行去未回空山廬舍已成灰形骸色
相誰真偽只有陽凝識本來

一卷琳琅字跡香寫成唐韻理華妝與君今
夕乘鸞去笑指雲中是上方

可許瓊漿乞一甌藍橋橋下水悠悠今番識
得雲英面玉杵雙雙是蹇修

玉洞無人不掩扉欲尋道侶說忘機遙看赤
鯉飄然過知是琴高被酒歸

寄書何處覓郵筒憔悴涇陽牧雨工得遇郎
君爲援手來朝貴主慶還宮

臘鼓聲中歲已闌來遲應怨步姍姍低眉掩
袖嬌羞甚蕢燭光明欲避難

清圃何處作生涯山外初開碧柰花恰好雙
成相過訪臨風先送笑聲譁

碧城十二絕躋攀翠水兼天四面環自有踏

波飛步法風宵月夕共槃桓

夢裏分明覺後疑百年身世履安危平生世
味都諳盡釜上黃梁未熟時

閑盡塵間幾變更堯時風雪漢時晴山深歲
月難消遣調虎馴龍過一生